

四庫全書

集部

欽定四庫全書

集部  
龜巢稿卷十

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷十

元 謝應芳 撰

疏

三教堂修造疏

推倒入我山三教一家之意踏翻生死海十方諸佛之  
心必須無風雨震凌乃可集江湖名勝青山舊隱白馬  
宏規欲求木于工師須布金于長者過我門入我室不  
妨分半席烟霞上我堂踞我床相與話三生風月祝聖

人壽報檀那恩

元山主造退居疏

掀翻黑漆桶舉頭見明月當空跳上白牛車拂袖喜春  
風滿路毋怪急流中勇為退步怕從鬧籃裏只管鑽頭  
但給孤舍祇樹之園則摩詰坐散花之室作鐵門限透  
金剛圈畫圖對綠水青山供養受清風明月應無所住  
作如是觀大千觀是一禪床但要覺得此安身立命之  
地百丈只有三轉語必須撞着箇點頭會意之人了是

因緣勝諸福德

梁寶寺修造疏

數百年祖師道場天龍圍繞五七件未了公案歲月因循要令折確散花生莫謂冷灰中豆爆有緣相遇何事不成大丈夫直下承當小比丘向前料理試看寶刹勝昔年梁武之時當效華封祝今上唐虞之壽無邊功德難盡贊揚

謝雨佛事疏

如憚如焚方慮亢陽之地既優既渥乃蒙甘澤之恩欲報效于鴻鈞敬皈依于象教伏念王某同羽士吳某冠裳雖異鄉井實同有公家賦粟之征無仙子食松之術望霓蹙額得雨寬心田疇不失於農時溝壑免憂於他日感造化鬼神之力誦如來秘密之言開法華道場設伊蒲法供伏願百靈鑒格諸佛證明雨我公及我私尚求霑足井而飲耕而食共樂豐登更冀萬邦之咸寧永賴一人之有慶

謝恩誦法華經疏

朝廷推曠蕩之恩饑饉處稅糧全免官吏執偏私之見  
施行間荆棘橫生欲徼福於百靈當投誠於三寶事雖  
不遂心曷能忘切念某等欽觀詔條可霑德澤赴愬為  
七鄉之衆奔馳歷半載之餘公乎私乎自謂上天能鑒  
仁者知者皆云不日而成雖一時遭毒斂之蛇或他日  
得塞翁之馬掃除梵宇持誦真詮二十四人同演法音  
六萬餘言重宣妙義設香花燈燭之供奉天龍鬼神之神

靈上荅聖恩下祈民福伏願一人有慶四海攸同大臣  
以道事君罔敢拂然綸之命庶人召後則往將來免粟  
米之征時和歲豐天長地久

誦法華經疏

作善降祥上古之書垂訓供佛有福法華之語流傳欲  
報德於百靈用投誠於三寶伏念某戶門孤立租賦交  
征為公為私寧無過咎有財有用幸遂經營居之安而  
資之深災不生而禍不作荷天錫福靡日忘恩擇三五



之良辰禮大千之諸佛肅陳清恭敬誦真詮伏願慧日照臨神天感格吾老及人老家家無凍餒之憂新年勝舊年旦旦有平安之喜

作佛事謝聖恩蠲租疏

官賦半蠲欽奉九重之詔聖恩難報飯依三寶之尊敬  
蕪清薰俯陳丹悃伏念某草茅雖賤稼穡維艱幸蒙曠  
蕩之恩又獲豐登之歲倉箱頓滿饘粥可供盡力催科  
喜輸官之易畢中心報效感聖代之難逢仰祝皇圖屺

修佛事伏願一人有慶萬壽無疆乃聖乃神乃文乃武  
聖德合乾坤之大自東自西自南自北清光瞻日月之  
明

結社畫淨土疏

嘗觀釋迦世尊說西方淨土教人念佛真方便第  
一義今欲依阿彌陀無量壽二經畫寫極樂境界  
仍遠法師會一百二十三人結為蓮社瞻依寶地  
修行淨業凡我同盟作成幸甚

西方國過十萬億有極樂世界九品生花東林社有廿  
三人與園悟祖師六時行道茲欲精修淨業亦須遠效  
前賢想像玉毫莊嚴寶地非助我者孰能為之孔方兄  
肯為結緣吳道子便教著筆有色無色有相無相看諸  
佛之本來面目如何先覺後覺先知後知見一頭之涅槃  
妙心方可頂門具眼言下點頭

海印菴起山門疏

遍大千界未嘗無見性成佛之人入不二門方得箇安

身立命之地希升堂必開戶牖為巨室必使工師敢告  
諸賢用求多助老僧作鐵門限儘教雲水往來世尊放  
玉毫光轉見山林輝赫大開方便是名莊嚴

請誌寶長老掩壙疏

為馬鬣封痛念慈親之歿作獅子吼願聞開士之言陟  
彼岷兮切有請也恭惟某人談空說有窮深極微叅透  
禪機面少室山中之壁得來佛法傳黃梅嶺上之衣五  
蘊皆空一絲不挂哀哉無恃幸爾有緣願師乘出岫之

雲為我送落山之月覆將香合子超昇在一轉語之間  
作箇土饅頭安穩於九重泉之下勿孤申請顯俟降臨

待雲菴雕觀音疏

念彼觀音本自尋聲救苦如是信解何妨粧假成真看  
良工刻畫之奇即菩薩化生之妙大檀越以七寶布施  
紫竹林現五色毫光龍女獻珠鸚鵡聽法瞿曇老千百  
億化亦須現光明之中善財子五十三叅管取在皈依  
之列其為福德難盡贊揚

請蔣居士造諫壁橋疏

編竹渡蟻陰德猶多乘輿濟人傳名不朽况此河梁建  
造兼之佛閣莊嚴必須有力量人了此大因果事某人  
荆谿秀氣竹筵遺風江水汲乾無一老點頭印可涅槃  
鑽透不二門信手掣開尚古人淳厚之風絕時俗浮華  
之態積而能散綽然有餘人皆仰之切有請也睽茲諫  
壁實乃要途爛月一舫每橫舟於野水垂虹千丈欲砥  
柱於中流惟其成此飛梁從此免令病涉竦挿天鯨跨

海兩邊鑱三尺闌干簾捲雨棟飛雲就上構七重樓閣  
如斯福德難盡贊揚

請蔣月堂建奔牛橋疏

古堰橫奔牛漫有前賢之句過橋乘駟馬方無病涉之  
憂必得其人庶成乃事某人為善最樂見義勇為廣造  
輿梁不特濟人於溱洧多修塔廟尤能事佛於祇園聚  
福海由歷劫之修登彼岸乃平生之願難兄難弟均懷  
編竹渡蟻之仁賢子賢孫綽有跨竈過父之美鄉閭稱

善湖海知名聘此官河實為孔道當一市人烟輳集通  
四方車騎往來每遇斷橋如隔弱水不有填河之鵲又  
無跨海之鯨欲得安行必須改作甃鱗鱗之萬甃護曲  
曲之迴欄車流水馬游龍聽揚名於道上月出雲虹飲  
澗看橫影於波間慷慨承當咄嗟可辦

置供佛花板疏

獻花發善智之心因緣不昧刻楮用宋人之手工巧難  
成必須上根器人會此好因果事曾中開發筆底化生



非莊嚴是名莊嚴此福德勝前福德看他枝葉似優鉢曇佛士之養為我苾芻作阿羅漢人天之供

天惠寺請愚隱長老開山疏

閭闔城萬竈貔貅多依佛刹給孤園七寶樓臺大闡禪關誰其尸之曰有人矣某人機鋒不露道價彌高若王侯將相往往歸心而淮海魚龍時時聽法慈悲願重救群生於刀鋸斧鉞之間常寂光明悟真空於文字言語之外逢場作戲到處為家必須豎硬鐵脊梁庶不負布

金心地久矣暗中摸索宜乎直下承當三十年河水重  
清唱開元太平之曲二六時天花亂雨入如來般若之  
門拈一瓣香祝九重壽

請亮西山住天慧寺諸山疏

佛法全盛以來在處有珠幢寶刹世道多故如此其誰  
能玉振金聲聞斯行之可為難矣某人頂門具眼鼻孔  
撩天數千卷貝多葉迷人都成一笑五百歲鉢曇花瑞  
世自得單傳悠然卧北牕清風久矣挹西山爽氣來此

矻中流砥柱我亦分東壁餘光蔭樹相依鼓鐘交作如  
如不動黑漆桶盡底掀翻綽綽有餘破紬襖為他重著  
慈悲廣大慷慨承當

天惠寺請亮西山住持疏

嚼啐鐵餒餒有幾人氣味相投搭著金伽黎二千載風  
流尚在顧天惠以記公刀尺政日來立百丈繩規去欲  
息肩來當接踵某人潑天聲價立地機關捋猛虎鬚早  
歲入曇華密室揮白麈尾前時坐三槐道場遶逢雨橫

風狂便欲山深林密如明月暗投者久亦陽春寡和而  
然闔閭城突兀叢林任天惠姑安虎旅午橋莊往來雲  
水聽雷音皆上龍門三呼北闕聖人一示西來祖意

方外交送愚隱師住萬壽寺疏

禪月道場為吳下叢林之冠凌霄法窟得淮南老虎之  
孫惟其祖武能繩可使家聲復振象龍雲集林壑風生  
其人如愚不愚以隱無隱所見即大乘境界其行皆實  
際工夫出入干戈曾救百萬億顛厓之命扶持宗社實

有三大千恒沙之功故名公鉅卿多以為師而諸子百家亦來問道今方外舊遊相慶了箇中大事因緣雖碧雲之出本自無心然白雪之歌莫非古意昔萬壽今萬壽祝聖壽之無疆彼一時此一時將盛時之重見

方外交送毅剛中住承天寺疏

峙巖峨石古道場金布祇園示一指禪衆僧寶珠還合浦頌馬齒掩嘉蔬之久如麟膠續斷絃之初惟得其人迺宏斯道某人曹谿正派淮海名流天下壯遊所至奏

陽春白雪山中舊隱向來分明月清風南楚翁謂青出  
於藍北山老喜拔茅連茹當此猊座重敷之日實為象  
法中興之秋王公大人既為更張天龍夜叉必加擁護  
菩提樹纖塵不惹初無今古之殊優曇花滿地還開聿  
見禎祥之意續燈諸祖祝聖萬年

新創水雲庵疏

鹿苑二千年河沙界多興佛剎龍江六七里水雲鄉宜  
建法幢布金地既已現成卓錫泉蓋將湧出權輿自我

恢拓在人振雷霆鐘鼓之音接雲水瓶盂之衆彈指頃  
要開樓閣筆頭邊當落珠璣長者布施七寶羅漢身何  
必朝西天而暮東土華封殷勤三祝聖人壽正須望北  
闕以頌南山福有所歸恩無不報

方外交賀顏悅堂住徑山疏

展開一坐具視十方皆雙徑道場扶起大法幢障百川  
為中流砥柱惟烏獲可勝重任如鸞膠能續斷絃既得  
其人必弘斯道某人德尊一代名徹九重金伽黎著處

雨露猶香玉麈尾揮時人天交敬賢相君問西來祖意  
針芥相投正法眼得東璵親傳鉢花重現連步上凌霄  
絕頂先聲至頑石點頭變瓦礫作七寶塔墀還成鹿苑  
滿虛空見五雲樓閣永鎮龍宮鐘鼓雷鳴鉞五星集士  
大夫期望如此者久矣佛世尊受記如彼者存焉只有  
天在上更無山與齊此地真為峻絕雖知燈是火不悟  
鐘非飯吾儕是亦知歸亟奉賀言尚圖宿覺

東隱菴化齋糧疏



世尊遺教每朝令乞化七家衲子坐禪在處要供需四  
事東隱菴雖云草創西來意正欲同參必先為餬口之  
謀乃可得安心之法三條篋緊縛腹此蓋藥山老特地  
求奇五斗米懶折腰是亦粟里翁有田可恃必須盃盂  
裡喫見成粥飯乃可蒲團上做著實工夫願諸公欣欣  
然指困看大衆兀兀乎面壁攪河成酪待他時節到來  
運水搬柴是我神通妙用常當飽德誓不食言

化募畫十王等像疏

數百年水陸科儀廣傳緇素三千界鬼神情狀妙入丹  
青看天堂地獄之不同使鐵心石腸之俱化莊嚴如是  
因果何疑欲得吳道子筆下通靈必藉孔方兄眼前助  
力有相無相非無相直須是得兔忘蹄大乘小乘最大  
乘更不待畫蛇添足諸公具眼為我點頭

西歸菴化齋糧疏

一把茅蓋頭即不免隨緣安衆三條篋縛腹豈盡能為  
道忘饑欲安廼心必餽其口望檀信舉指困之手令木

魚作呼粥之聲凡釜中爛煮虛空僧堂裡儘留雲水佛  
世尊著衣持鉢幸傳流如此家風龐居士運水搬柴但  
作用無非神妙施當有報誓不食言

千墩寺造木橋疏

編竹筏而渡蟻猶有陰功造輿梁以濟人豈無因果千  
墩浦素為衝要駟馬車孰不往來惟相逢一笑揮金可  
便使群工斫木試看流水即跨長虹澱山湖水國人家  
自是生成圖畫趙州老石橋公案別當拈起話頭了是

因緣勝諸福德

大祥薦父水陸道場疏

代徐伯樞薦父徐太中作

喪不過三年鞠育之恩罔極佛能度一切慈悲之願弘  
深俯瀝丹衷仰干皇覺伏念某顯考某官搢紳推重臺  
閣蜚英立身揚名以顯其親賣金買書而傳於子赤心  
報國居京師為三品之官白骨他鄉賴朋友掩一杯之  
土死或悟空花之幻生豈忘風木之悲遠亂離而蒲伏  
莫前非忍澗而劬勞敢負旅櫬雖藏于東薊神遊當往

于西方祥禪日臨緇衣雲集吹螺擊鼓熏修按水陸科  
儀掃地焚香禮拜作天人供養伏願一靈感格諸佛降  
臨執金剛臺接引至七寶金沙之地瞻玉毫相化生託  
四色車輪之花凡在幽冥悉皆超度

水陸道場榜

同前

今據某郡某州某鄉奉佛弟子徐某及弟某等投誠伏  
為顯考太中大夫中書戶部郎中徐公不祿以來致喪  
三年禮宜除服追念父恩昊天罔極取至正二十一年

十二月廿六日為始啟建冥陽水陸大齋三晝夜藉此

良因用伸超度道場

法事條具左方

喪制有終人子念

劬勞之報法門無量世尊垂慈愍之仁故弘開水陸道

場乃大集河沙功德天龍圍繞嶽瀆感通今齋主徐某

等念先君壽五六十年生斯世成百千萬事官居三品

名聞四方衣紫隨朝所存者致君澤民之志焚黃先世

且及乎封妻廕子之榮痛憐客死于京華欲得神遊于

淨土廣邀緇侶虔禮金僊琅函展貝葉之文鐵鉢供伊蒲之

饌香雲縹緲花雨繽紛樹燈懸明月光阿鼻獄爍開幽  
暗斛食施甘露味尸陀林充滿饑虛凡所謂六道四生  
皆于此三皈五戒是名無礙以濟群生其齋主當盡乃  
心我清衆各修厥職有感斯應無願不從徐公百不憂  
方直往於極樂恒老三轉語更何在于多言無間寃親  
俱能解脫

廣濟菴道者化修造等緣事疏

瀕湖祇樹園林劫灰久冷大地禰花世界佛日長明三

條篋縛腹緊做工夫一莖草瑤樓須教出現分甘古井  
總是醞醐想像靈山粧成寶地無孔笛要聲諧律呂有髮  
僧當力効殷勤諸公從筆底落成不日見眼前窠兀燕  
雀相賀龍象群居比丘衆千二百五羅漢重宣般若方  
丈室八萬四千師子共禮維摩壽祝楓宸福歸檀越

蛟龍菴塑觀音等像疏

觀世音七佛之師神通具足阿羅漢諸天之衆在處依  
歸今欲令粧假成真奈不解將無做有諸開寶藏滿載



鐵船對長洲茂苑之江山作補陀落迦之境界願菩薩  
三十二應剎剎度人看善財五十三參時時見佛相逢  
具眼必為點頭

忠清院修造疏

忠清公宇宙隔越猶奉烝嘗瞿曇老風雨振凌豈容坐  
視雖曰即心是佛也須開口告人小苾芻固碌碌不才  
得錢米則多多益辦八萬四千修月斧儘爾時匠石呼來  
百千萬億恒河沙願施主福田增廣但蒙金諾即注銀

鈎

萬峰菴修造疏

半夜傳衣諸佛祖當時道在九年面壁小禪庵近日人多本來無鏡以無臺亦合肯堂而肯構工師求木非赤手而可圖長者折枝須點頭而相許金錯刀作成有用鐵門限準備都來雲水依歸天龍擁護橫展布金之地大開選佛之場豎起硬脊梁每日坐三條椽下掀翻黑漆桶大家上百尺竿頭壽祝楓宸福歸檀越

化城菴鑄銅鐘疏

舊用鐵  
今易之

舊錯聚六州之鐵久已知非新鐘鑄萬選之銅今將改  
作惟檀越共為爐鑄而蒲牢即出範圍作興禮樂於山林  
號令人天於夜旦山鳴谷應八百聲吼動鯨音月落烏  
啼三千界喚醒塵夢

佛會祈禳疏

時和歲豐喜見昇平之兆天高地迥難酬覆載之恩感  
仰鴻鈞皈依象教切念某等或僧或俗為里為隣田疇

茂水旱之虞邊境絕烟塵之患物無疵癘家用平康夔  
蛟如此其相憐豺獮豈忘于報本莊嚴寶地諷誦琅函  
遍禱之天地神祇同鑒此河沙功德伏願一人有慶萬邦  
咸寧日斯邁月斯征立見秋成之富災不生禍不作羣  
居生計之安

化衣鉢疏

世尊入舍衛城也須持鉢祖師過大庾嶺先已傳衣惟  
二者之得兼乃一生之可了奈羅兵燹俱化劫灰令千

求衆檀越相成庶圓滿小苾芻所願一鉢在手三衣稱  
身海上降龍使可比六通羅漢山中禮佛更不需半點  
塵埃由此成功誓將報德

法華經會疏

為陵楚  
卿等作

世尊千百億化愍大地之衆生法華六萬餘言有恒沙  
之功德欲憑資報是用皈依切念某等忝在人倫幸叨  
佛庇天地為之覆載風塵迨乎廓清擇暮春望日之良  
辰建同社常年之勝會三周七喻齊演梵音六道四生

俱聞妙法供陳脯笋香爇旃檀賴象王願力之弘深感  
龍天鬼神之歡喜伏願潛銷黑業復見清明熾而昌壽  
而臧戶戶獲康寧之福災不生禍不作年年遇豐稔之

秋

化修造疏

西歸菴勤上人寫金字法華  
經化修造及增益觀音殿

有漏無漏硬脊梁撐住虛空前三後三爛葛藤掃除風  
雨要此屋似銀山鐵壁問誰家無明月清風孔方兄但  
為點頭公輸子便教動手敢持貝葉用告恩檀黃金字

寫七軸蓮葉藉妙法河沙願力白玉毫現諸佛菩薩看  
圓通宮殿隨身是名莊嚴勝前福德

散花文

為恢上人作

夫散花者心地栽培善根滋長春生金剪枝枝奪造化  
工夫香滿錦堂朶朶作人天供養如風飄墜似雪繽紛  
優鉢曇大地皆春曼陀羅從空亂雨昔天雨散之維摩  
室中者此也我世尊拈于靈山會者同乎勿云色界迷  
人正要頂門具眼肇自一花而五葉皆為同氣以連枝

欲了知是色是空須會得無聲無臭桃紅李白河陽縣  
車馬塵多魏紫姚黃洛陽城綺羅香溷曷若傾葵心于  
佛日乃蒙盼蓮目于慈雲想像金園莊嚴寶地千江水  
見千江月共看法性圓明一片西飛一片東當悟色身  
虛幻其為因果難盡贊揚

募長明燈油疏

密地工夫不用說石窻油盞普天照耀要單提露桂燈  
籠老苾芻畧用吹噓大檀越正須傾倒膏馥沾溉因果



分明二六時中常別起靈光一點三千界內總利他癡  
暗衆生

西歸菴修梁武懺疏

空王為象教之尊慈悲廣大懺法脫蟒形之苦因果昭  
彰既響報于昔年宜精修于今日即蘭若飯依金相為  
檀那宣演琅函必須衆力維持乃備諸般供養作功德  
海開解脫門娑婆世間滿眼是誌公和尚忉利天上舉  
頭見郝氏夫人福德無邊讚嘆難盡

二聖院浴佛疏

九龍水浴紫金身慶西方聖人初度二聖菴結白蓮社  
繼東林遠公道場想像毗藍皈依極樂大檀越隨喜布施  
小比丘如法莊嚴諸塵非塵是名微塵清淨身本無塵  
垢憶佛念佛必定見佛廣長舌同演佛音幸發心花共  
成因果

滄洲菴修造疏

本菴艸創之初事有未備茲欲蓋造前軒裝塑觀

音聖像晨香夕燈修行淨業端為祝延聖壽上報  
四恩旁資三有敢望諸大檀越相與作成指廩揮  
金多多益辦

插竹建精藍鎮蛟鼉之窟宅開花成結果展龍象之法  
筵莫謂滄洲菴小小規模要作補陀巖巍巍境界軒開  
寶地像塑珠纓惟諸公同為結緣則良匠皆能呈巧莊  
嚴相好非莊嚴是名莊嚴福德因緣此福德勝前福德  
功歸檀施壽祝楓宸

化城院募緣疏

本宅以下元令節啟建念佛道場與諸上善人同  
修淨業所用香燭齋供之儀望樂助焉其為因果  
蓋有讚揚難盡者惟好者領之

叅一指禪本元元坐三條椽下念幾聲佛要人人生九  
品華中當此下元敢提前話舉赤手欲諸般辦集用青  
蚨須衆力圓成香火焚修人天供養看西方極樂世界  
只在目前比東林祖師道場亦非分外願言向道請為

結緣

千墩寺翻蓋大悲殿疏

延福寺襟江帶湖梁天監之年遠矣觀音殿震風凌雨  
魯靈光之狀巋然雖千手千眼乃吾佛化身然一瓦一  
椽皆衆人願力因緣有遇修證何難磨磚時用南岳工  
夫加泥處會古靈說法即有漏而無漏在求仁而得仁  
寶蓋珠璣瞻妙相於旃檀林內金螭鐵鳳展畫圖於秦  
柱峯前壽祝楓宸福歸檀越

齋僧簿叙別

徑山興聖萬壽禪寺徒弟淵切見宿生多幸忝與  
僧流道業無成四恩罔報謹以平昔所受信施之  
資自四月八日為始齋僧千員每員銅錢四十文  
為一飯之供敢望各題芳字以滿區區之願云  
出家以六和為尚勉守清規傾囊與衆人結緣願酌素  
志效減米同舟之意助折蘆渡水之行一千員白足倘  
過茅菴四萬箇青錢聊供蒲饌東手來西手去免虛孤

信施之恩左畫圓右畫方請連署題名之筆佛日照監  
宗風振揚

釋氏舉棺文

代昇東爲衛母作

佛說西方極樂邦大千沙界更無雙諸天接引移蓮步  
認取光明大法幢恭惟某人現婦女身生娑婆世不宿  
業八十幾年之內發三菩提心慕樂土十萬億國之西念  
阿彌陀佛三從不失五戒能持子行孝而暗合禮經婦  
服勤而俱無評語愛男孫女孫之親意毫髮無偏待姻

黨鄉黨之真情骨肉相似報緣斯盡享福亦多到這裏  
蓋棺事定正要脫灑出門超凡入聖嘆一脚踏翻生死  
海逍遙直上九華臺

活套起棺文

代吳彥德作

野花繁盛不多時明月團圓亦易虧一竅鑿開方寸地  
百年生死了無疑恭惟某官天性高朗心地坦平精勤  
六十五年料理百千萬事嗣祖宗之基業實為有光了  
男女之室家皆如所願到這裏出門一句要說到佛老



氏未曾說處神鬼皆聽會麼自古斯民行直道青天白日甚分明

剃僧頭致語

然解脫香點光明燭恭請十方諸佛說法度人要人之  
四大幻身脫塵離俗煩惱根盡皆除去菩提樹自此員  
成伏願法嗣興隆不負真如之印宗門光顯能傳無盡  
之燈詩曰煩惱根生歷劫前如今盡落寶刀邊頂門露  
出金剛眼照見三千及大千

募緣造藥師琉璃燈疏

諸佛開方便門救衆生之苦楚歷劫轉光明藏破六趣  
之昏迷藥師燈宜用於道場桑門氏合營其法具煌煌  
火樹欲他因地移來朵朵金蓮自我心花發現惟金諾  
一揮大筆便玉成數尺長檠毋論燮蠟之齊奴絕勝燃  
犀之温嶠膏澤注琉璃盆內恒沙佛同放白毫恩光分  
阿鼻獄中大地人皆除障業功成普照福有攸歸

薦父醮詞

親恩罔報勉為改葬之圖道力可憑敢有超昇之望俛  
陳丹悃仰徹玄穹切念先考某官蚤稱善人晚罹惡世  
羣雄血戰故避地于湖南一旦身亡乃迷塗于道左以  
兒女室家之相失豈衣衾棺槨之能周荼毘近效乎緇  
流煉度全憑于羽士積藏神主地易佳城設齋醮於新  
居薦英靈於仙府十極之高真降監九原之幽滯同升  
伏願天得以清地得以寧由是魂升而魄降父止於慈  
子止於孝庶幾本立而道生存歿俱安幽明無間

妻亡終七日設醮疏

失內助而興哀音容如在祈上蒼之垂愍魂魄超升俛  
瀝蟻忱仰干鴻造切念忘室王氏自少結髮至老同心  
七正室側室之尊卑渾無妬忌均養子庶子之親愛皆  
盡劬勞諧和而處者閱三十餘年頃刻而亡者又四十  
九日蝸居設醮羽士朝真誦靈寶之妙經獻齋厨之清  
供伏願蒙恩三境超度一靈脫跡塵寰棄絕人間之事  
標名仙籍逍遙天上之遊

早壇辭

上天之載廣犬難名如日之昇昭明無際雪手香花之  
供星冠玉筍之班伏願三境巍巍並降臨於下土萬靈  
奕奕咸拱衛於中天

午壇辭

日之方中式瞻光耀風斯在下重覲威顏心傾葵藿之  
誠躬致蘋蘩之薦伏願恩覃九域均蒙化育之仁澤及  
九泉罔俾沉淪之苦

晚壇辭

日之夕矣禮益宜勤天可必乎善無不報仰止九闕之  
望肅然三接之儀伏願浩浩其天鑒惓誠于方寸昭昭  
在上升德澤于幽冥

幽醮建壇詞

為王文父  
作凡五首

兩喪終制靡忘追遠之誠百拜顙哀敢瀆蓋高之聽肅  
瞻金闕肇建瑤臺絳節下臨綠章上達魏魏蕩蕩洽大  
德于寰區窈窈冥冥度幽魂于泉壤

早朝詞

明發懷二人恐淪鄂土齋沐祀上帝祇仰鈞天昭對威  
顏備殫悃幅伏願維天之命恩光被于重泉如日之升  
魂氣超于清境

午朝詞

日之方中祥輝廣被道之云遠仙仗遙臨載伸對越之  
忱庸表虔干之義伏願清都洞鑒共循晝接之儀幽壤  
超升永脫昏迷之境

晚朝詞

日忽忽其時暮深念幽冥皇剡剡其揚靈允能超度惴  
馬三瀆仰止九天伏願黑籍銷名長夜脫沉淪之苦丹  
臺受錄熙春樂道德之言

青詞

甥姪銜哀先後七旬而無怙聖賢垂訓古今三載以終  
喪俯慚悲悼之忱仰徹穹窿之慶伏念先兄某創業歷  
胼胝之苦黽勉成家妹夫某贅居為骨肉之親始終同



爨幽冥隔世祥禪踰期緣歲凶重困征徭故日久有稽  
薦拔爰憑羽士式演真科三熏飛奏其綠章諸孤泣除  
其素鞵不違天于咫尺如履冰而戰兢

薦父幽醮建壇詞

為王敏  
孟學作

陟岵興哀欲報劬勞之德籲天歸命庸伸薦拔之誠俶  
建瑤壇式敷珠笈伏願罪除黑籍名署丹臺零落歸邱  
山悟人間之夢境清高隔風雨遊天上之仙都

薦父青詞

子養親不待深負劬勞日邁月斯征遽經祥禫對越虎  
闕之遠敬陳蟻悃之誠伏念某先考某質直一生辛勤  
多故仰事俯育盡心堂構之謀朝出暮歸殫力戶門之  
役訓子觸屏而無怒賓妻舉案而甚恭忍棄諸孤倏逾  
三載雖雪衣之已釋奈風木之堪悲所冀超昇有嚴醮  
事伏願帝鄉可到仙靈必通遊白玉京行矣跨吹笙之  
鳳朝紫金闕飄然往飛鳥之鳧

醮星青詞

代陳子純為  
弟穰疾作

天有六淫疾病多由于感受星羅萬象吉凶或繫于運  
行稽首瞻天傾心告斗伏念某弟某一身多病數月弗  
瘳手足拳攣動若太山之挾胃膈否塞梗如雲夢之吞  
敬修清醮于生辰敢乞洪恩于列宿伏願璣衡照鑒瑤  
闕感通德星聚太邱憂者樂病者愈熒惑退三舍居之  
安資之深

幽醮薦父青詞

子養親不待難酬罔極之恩民欲天必從敢徹蓋高之

聽蟻忱所禱虎拜具陳伏念某同弟某父歿踰一十五年深負終天之痛母喪畢二十五月又逢忌日之臨怙恃俱無劬勞曷報爰憑道衆式演真科區區盡對越之誠切切有超昇之望伏願千真列衛九老啟途左畫圓右畫方變化五城之境東王公西王母逍遙三境之天

道士化法衣疏

神仙足官府追陪長用鞭鸞海圖折波濤補綻豈宜顛鳳黃冠空戴藍縷包羞必須着紫霞衣乃可立紅雲殿

窮道人不妨鈔化富公子當為作成  
曳月出門待金闕  
曉鐘之後攜烟滿袖拜玉皇香案之前報施主恩祝聖  
人壽

請曹月湖舉棺疏

蓋棺已矣生死關未脫塵寰出門何之神仙路豈無捷  
徑敢煩指示庶獲超昇恭惟某人和光同塵尊德樂義  
一襟湖海湛如明月澄波三尺風雷閒與孤雲出岫嗟  
我雁行之相失煩師鶴馭之寵臨說破玄關大道只消

一語喝醒凡夢飛魂直上九天

請鄧混然起棺

蓋棺雖定莫酹母氏之恩拔宅無緣那到神仙之境必  
求高士為指迷途恭惟某人和光同塵出類拔萃發揚  
宗教混然活水之源游戲辭章蕩蕩乎春雲之態簪  
星曳月乘虛御風仰希鳴珮之臨分付出門之語喚醒  
濁夢俾聖善之超昇飛上清都庶精神之不死再拜稽  
首萬望點頭

代仁惠觀請周彥忠

孔李通家之交蓋由道義楊墨歸儒之道必賴師模誰  
其尸之曰有人矣恭惟某官才高時輩譽藹旦評濂學  
家傳不刻牕前之草唐詩句好能吟觀裡之桃來坐臯  
比行看豹變某強名曰道主善惟師敢期如大匠誨人  
幸勿拒童蒙求我道其道德其德應慚所學之不同步  
亦步趨亦趨但願其徒之速肖

代歸真觀請孫伯昭

寄老子法中強名曰道誨諸生館下主善為師久欲依  
歸敢云招致恭惟某稽古究春秋之學蜚英冠月旦之  
評不惟獨抱遺經抑且旁通百氏玄都賦種桃之句足  
擬唐人山陰寫籠鷲之經可同晉帖平居養素尤善談  
玄才名三十年未嘗厭廣文之飯扶搖九萬里尚肯為逍  
遙之遊大器晚成英才樂育如某者仰如山斗居此窺  
天墨歸楊楊歸儒曾聞其語士希賢賢希聖實慕斯文  
敢設坐氊以迎教鐸孺子或容其進履相儒可隱于書



堂澹泊相忘清虛共守道其道德其德小哉坐井之觀  
步亦步趨亦趨矐若絕塵之後馱芹申敬鑒茹為榮

蓋菴疏

為江叔廉作

潦到餘生三百峩寒蓋未了流離數載千萬間廣廈誰  
依菴居卜築于江湖土著便同於鄉里竹開三徑藤刺  
四簾惟諸君贈草堂之資則老我得菟裘之計脫粟飯  
視同珠玉苦菜根嚼出宮商養蒸藿之幽姿變膏粱之  
舊習落成有日座中約青州從事交驩繼美當年杯後

為冰壺先生立傳幷幪有自感戴奚忘

壽寧寺請源別流住持諸山疏

嵯峨古塔雙尖插霄漢之間蕭瑟禪林一變經烟塵之  
後念正法凌遲者久待偉人振厲而興某人豎硬脊梁  
有大力量宗門下識時俊傑緇衣中少年老成從金山  
躍龍門如神鼉鼉鼓舞對劍井坐狎床說法猿鳥依歸  
能于此扶顛持危乃卓然出類拔萃烟霞接境庶幾分  
東壁餘光雲水滿堂相與挹西山爽氣式修鄰好益振

宗風

方外交疏

比年以叢林凋謝恬養者多望望而去今吾別流  
源公以壽寧禪寺禮聘之勤奮為茲山領袖真可  
謂以道自任者也吾黨之士深用贊歎敬緝儷語  
以效燕雀之賀云

千丈渾寸膠難澄久僕河清之日百鳥鳴孤鳳忽見將  
來道泰之秋顧茲山並立浮屠由前代特稱名利駕言

弘道允在得人某人學有源流名揚湖海妙高臺了翁  
法窟如青出藍毘陵郡新興道場如風偃草遊戲卓水  
雲之錫棲遲橫野渡之舟末法中為宗門棟梁知音者  
歎朱絃疏越堂前露柱明明為諸佛放光塔上風鈴疊  
疊與衆生說法

華亭縣請仁伯靜住宣妙寺山門疏

鳴百里之絃歌固云在我振叢林之鐘鼓正在得人由  
諸山鷄薦而來宜千仞鳳翔而下某人崑邱產玉合浦

藏珠蚤遇作家函丈入澤公之室中居報國法筵提智  
者之綱仁者靜固其本心道之行綽有餘力望雲出岫  
如月當空虛室白生即洞達光明之藏華亭清唳亦宣  
揚微妙之音聖壽萬年法輪三轉

諸山疏

同前

繼三支而稱博學遠躡遺蹤用一夔以作大章足知雅  
曲時則可矣聞斯行之某人冰雪丰姿江湖襟度執經  
問難遍叅諸老之門領懺司賓兩秉叢林之政蜚英聲

于方外展濶步于雲間踞鳳凰山作獅子吼天高地迥  
面九峰翡翠之屏月白風清目三泖水精之域

方外交疏送大雲講主權住福壽院

福壽禪院者錦溪之佳處也山中耆舊以主席不  
宜久虛力請我大雲和尚居之事雖從權而林泉頗  
為增重吾黨亦可尋盟蓮社矣持一瓣香綺語以

賀

山不在高安靜處卓飛空之錫老當益壯談笑間用合

道之雄暫踞猊床橫揮塵拂某人春秋八十功行三千  
豎弘教硬脊梁得天台真骨髓慈雲廣大諸方蒙教雨  
旁霑智月圓明在處有人天交贊鐘鼓震錦溪北柵衣  
冠比廬阜東林或疑為入谷之幽自謂作逢場之戲法  
雖修于出世義不失于隨時當此黃楊厄閏之秋乃有  
白蓮結社之日魯司寇攝行相事曾三月以成治功遠  
法師影不出山且六時而修淨業薄言燕賀永締鷗盟

永安院尼請禪老興正宗住持疏

余曩歲以衣鉢之資檀施之力創造本院年今八十有六力不能支且無法嗣是用以一應恒產捨為十方禪刹恭請紹隆正宗和尚入院焚修接納雲水契券雖明禮宜疏請

昔天竺第一代祖師得度賴阿難之力今震旦徧十方禪刹流傳皆達磨之宗欲改換其門閤宜選擇乎領袖位須德稱道在人弘其人學有淵源名揚湖海千巖窺刹目謂能承鐵壁箕裘一把茅蓋頭又多挹玉峰溫潤



撥慈航過來不遠將法幢扶起何難雲擁狹床風生塵  
拂泗橋流水喜縈田說法之場祇樹獨圍當恢拓布金  
之地香捻一瓣壽祝九重

真武經堂會置田疏

代張伯祥作

某將建真武道堂為吾黨月會清修之地築室塑  
像勉當獨為預置齋田敢哀衆力惟諸君領之

上真玄聖揚靈足踏于龜蛇下土蒼生報本心同于豺  
獮擬一己力營真館率諸賢預買祊田年年得黍稷之

金史四八  
卷十  
馨日日奉蘋蘩之薦永言祭享賴此膏腴作善則祥不善則殃此體物不遺之妙同盟之人既盟之後正自求多福之秋筆底揮金隴頭種玉

置草堂疏

代施天朋作

某久客橫塘視同鄉土業欲築室于此圖將老焉敬惟諸君子夙昔庇士必賜作成修辭抒情不自覺其抽黃對白也

仲宣依劉荆州慷慨作登樓之賦子美詰王錄事殷勤

覓艸堂之資蓋依仁乃客子之本心然范士寶故人之  
高誼孔方兄但能助力公輸子便可成功鶴帳弗空菟  
裘可老屢成而燕雀相賀喜化日之初長門高而車馬  
能容看德星之常聚帡幪有造感戴奚忘

方外交疏

予生寡諧俗特於方外高識之士樂與之游若我  
雪心和尚前居南山相好為忘年交今主領天寧  
禪寺緇素歡欣山林德色予于是緝數語以頌其

美以抒其交情云

齊雲古佛刹留泗州僧寶之衲衣慧日大法門為常郡  
禪林之冠冕稱其名宜有其實弘其道必得其人恭惟  
顯公禪師妙年老成奇器卓犖入松林室中布毛吹雪  
傳無盡燈坐楞伽峰頂塵尾生風握真如印如卷舒于  
前日大展布于斯時金斗城圖畫天開鐵門限搢紳雲  
集爾乃竿木逢場而作戲我豈燈花有約而不來青青  
翠竹鬱鬱黃芽聽法皆能會意巍巍高山洋洋流水知

音當為點頭燕賀聿修鷗盟永好

招魂致語

為陰陽正術吳彥德作

伏以孤正首丘凡物有本原之性鶴歸華表雖仙亦故里之思三魂或散于異鄉一念可通于八極焚香拜跪剪紙招要切念近故某官生有多聞死無遺憾馳驅日下空知行路之難漂泊天涯竟作顛崖之墮玉門關峰迴路轉金斗城物換星移庸歌宋玉之詞敬效巫陽之力往年蜀魄思家而千載號呼今日楚魂歸第而六親

迎迓洋洋如在肅肅有聲高堂共燈燭之光靈几享殺  
羞之薦月白風清此良夜獲叙幽情水遠山長愁殺人  
變為佳境

醜諸友買石題獨孤公檜四字

廬山種蓮堪笑者區區佞佛董林哉杏可憐哉碌碌勞  
生玉箸篆重題姓字金斗城倍有輝光尚須假力于錢  
神即俾奏功于匠氏似羊公一片石乃大書而特書此  
季子十字碑尤居簡而行簡願言鳩僦請與鷗盟

干親友重構草堂

代黃仲器作

荒徑猶存陶彭澤歸來太早吾廬獨破杜少陵受凍何  
堪巢一枝欲比鷦鷯樹三匝正如烏鵲室廬拮据風雨  
幘幪孔方兄毋吝點頭公輸子便令動手十萬貫揚州鶴  
上人自求仙八九家錦里村居吾將老矣合矣完矣優  
哉悠哉

大林菴佛像裝金法事疏

芳茂山大林道場鼎新葺故補陀巖圓通法會粧假成

真仰恃慈悲俯陳悃悞切念某鐵船渡海鉏斧開山浩  
浩劫峯玄都之兔葵淨掃凜凜甘露獨園之祇樹新霑  
從把茅次第鳩工置刻木粒嚴像設金色界移來勝境玉  
毫光照見恒沙鐘鼓雷鳴瓶盃雲集一宿雖成于頓覺  
四恩當報于將來伏願佛日照臨龍天擁護我見人見  
衆生見因見趣以精修梵音妙音海潮音觀音聲而圓  
悟尚期檀越同證菩提

橫山白龍祠修造疏



天蓋高而地蓋厚人能感通山有仙而水有龍官為祭祀必嚴廟貌乃稱輿情公輸子欲便興工孔方兄必先助力蜿蜒靈物想像高堂駿奔走執豆籩參酌用古今之禮鼓雷霆順風雨願言無水旱之憂輸與美哉神明彰矣

重造東山港木橋疏

東山趾頭橫巨港橋斷連年東里子產無乘輿人皆病涉每鶴立相呼趁渡令鳩工重作飛梁事欲速成力須

多助牽牛來往真可比牛郎七夕之牛乘馬徑過亦何  
異馬卿駟車之馬吾事濟矣衆皆悅之

無錫興道鄉重建太平橋疏

長安道到處皆通溪山滿眼太平橋連年大壞鄉里驚  
心義合勇為力宜多助不用集填河烏鵲便當見跨水  
虹蜺乘輿濟人施惠毋勞于子產丈夫題柱揚名何異  
于長卿

方外交疏賀哲既明為弘聖講主

壽安山坐鎮朔方如如不動華嚴海流傳妙界浩浩無  
邊惟得其人乃弘斯道某人學窮員頓道混根塵舌上  
瀾翻皆白馬未駝之文字胸中囊括有黃龍不測之機  
關挺然冬嶺孤松接乃秋江正派即從別業以豎法幢  
天龍加以護持猿鶴為之鼓舞江流百數里同梵音演  
竺國之經吾輩十餘人比賢士結匡廬之社尚期珍重  
式副願言

重建忠祐廟疏

自隋朝稱八絕之靈巍然廟食與陳墓對一坏之土歸  
若堂封人傑地靈者八九百年灰飛烟滅者一十三載  
剪除荒棘經營閔宮展今日之宏規復前人之舊觀工  
師求木政須用使鬼之錢長者折枝敢請下如神之筆  
紅雲殿香雲繚繞白鶴溪流水迴環看眼前突兀之屋  
既成有栽上槎枒之松堪畫雖雖在宮肅肅在廟儼遺  
像於丹青赫赫厥聲濯濯厥靈振英風于今古福歸庶  
士壽祝一人

普度齋壇榜

大地衆生多沉淪于苦海恒沙諸佛能拯救于慈航會  
遇有緣冤親無間切念齋主僧某洎諸信士等為見曩  
因喪亂兼值凶荒或被戮于兵戈或遭烹于鼎鑊或疫  
癘而全家不起或饑羸而比屋俱亡月明星稀長夜發  
無依之嘆天陰雨濕常時聞冤哭之聲三寶前今獲皈  
依九泉下悉令解脫故此新開鹿苑于焉延奉象王命  
必芻按乃科儀傳華嚴諷諸經典燃火樹照阿鼻獄焜耀

靈暉施斛食拌尸陀林飽饜甘露齋主宜志心歸命僧  
流當竭力奉行有感必通無欲不遂伏願佛垂慈愍人  
得超昇玉毫相光照十方咸聽正法金沙池花開四色  
同往化生壽永天家恩霑沙界

千人贈人疏

嘗聞朋友有通財之義今某人毘陵人也久客居  
貧欲還鄉而不可得敢請諸君子仗義以贖其行  
真美事也

聽馮驩彈缺之歌不勝感慨覽王粲登樓之賦亦甚懷  
歸事有難言理宜代述某鄧侯華胄毘陵宦家二十年  
海內兵戈遭逢塗炭五千卷胸中文字收斂光芒故園  
之松菊都荒暮景之桑榆不暖但空載滿船明月豈能  
乘兩腋清風惟諸公曰餽贖焉則此老營菟裘矣腰纏  
十萬貫便可比揚州之行負郭二頃田更何用蘇秦之  
印毋嫌饒舌特為點頭

代曹仲鉉募親舊作隱居疏

白髮三千丈悵然咏謫仙之詩行窩十二家徒爾慕堯  
夫之樂借巢鳩拙繞樹烏飛屋茅席卷於秋風衾鐵寒  
添於夜雨欲新構作菟裘之計必故人贈草堂之資經  
之營之完矣美矣潞城風景幸春回兵革之餘劍井虹  
光者日射軒窗之外悒悒有自感戴奚忘

道家受生會疏

大功不宰巍巍乎上帝難名小道可觀碌碌乎下民有  
報蓋豺獮不忘其報本即潢汙可薦其真誠芳名請日



下先題勝會在天中令節惟白水真人辦力有玄都道士通靈水到渠成山鳴谷應天一地二天三地四要之同受于初生人一已百人十已千宜爾力行於斯道

黃鶴菴居疏

滄五粒松前度看桑田變海縣一壺藥今番結茅屋居山要得如清溪道士之家必蒙助白水真人之力帡幪有造修養奚難遶香烟鶴聽珠經山鳴谷應養神丹龍蟠金鼎地久天長

辨惑編鋟板疏

左賦初傳洛陽紙頓增多價白詩可易雞林賈猶用一  
金矧端人正士之立言皆至聖大賢之遺訓人能弘道  
德必有隣切見龜巢老人行年彌高信道愈篤文字五  
千卷筆前言為辨惑之編辛勤三十年絃古調待知音  
之聽固緝補其舊矣宜鋟梓以廣之登山采玉入海求  
珠所寶無暗投之歎製芰為衣紉蘭為佩相成俱化薰  
之功珍重斯文咄嗟可辨

奔牛壩南重建井亭疏

古堰橫奔牛高下分河中之水碾渦深沒馬傍邊宜井  
上之亭中書君但請揮金公輸子便能求木畫檐飛起  
金臺接藹藹之雲烟素縷來趨樂石皜泠泠之冰雪願  
言多助立見落成

沈子英以先塋毀於兵重葬木主作佛事追薦  
疏

七十二疑塚求全難救於昔人千有億化身超度祇憑

於我佛投誠三寶進悼雙親伏念某顯考某官顯妣某氏歿有後先恩皆深重北邙埋骨不期毀馬鬣之封西郭招魂復用卜牛眠之地祔卯君而安厝題神主以珍藏情極哀傷事從權變爰命緇衣之侶共陳素供之儀鳴佛樂于法筵宣梵音于教典聚功德海及尸陀林伏願佛日照臨人天感格九品蓮臺之極樂父母超昇一坏莎土之無虞兒孫祭掃天長地久存順沒寧

方外交疏賀行敏中住永慶寺

塵生東海八荒宇宙重開石爛南山一壑烟霞猶在欲  
起廢而還舊觀須作興以布新條水到渠成山鳴谷應  
某人深悟單提之旨旁通百氏之書石麟角煎膠續絃  
從禪月道場得來三昧秋兔毫囊錐脫穎有潑天聲價  
震動諸方道之行與時則可矣折松枝升座說法種蓮  
華結社招賢且自怡隴上之雲將突見眼前之屋置草  
堂宿土舍今吾似少陵先生留玉帶鎮山門何代無東  
坡居士燕賀有喜鷗盟弗渝

忠祐廟修造疏

世稱八絕數百年人傑地靈廟食一方二十載灰飛烟滅欲舉手作長廊廣殿向知音說流水高山老我鶴歸良工鳩集惟長者秉如神之筆能慨然助使鬼之錢經之營之完矣美矣丹青遺像若生存大業之初恢拓弘規將復見靈光之舊福歸衆信壽祝九重

諸山請借長老住報恩寺疏

金園祇樹胡少師原是恩檀玉筮菖蒲蘇長公曾留詞

藻雖往事盡成隳廢惟得人乃可作興某人學有淵源  
聲溢湖海大力量能勝重任諸行輩或稱老成松月堂  
前吹布毛于禪衲錢塘江上揮麈尾于法筵斷絃琴未  
續朱絲無孔笛別成清調如斯出手方謂作家岸為谷  
谷為陵更者歷僧祇之劫士希賢賢希聖會當傳佛祖  
之燈隣壁光輝宗門焜耀

三山湖重建木橋疏

踏蘆渡水莫言他物會通神伐木為橋且作此目前方

便故址在雨汀烟渚良工運月斧風斤要得速成必須  
多助彷彿填河之烏鵲依稀跨海之虹蜺三山湖岐路  
縱橫人無病涉駟馬車諸公絡繹自可留題濟衆云功  
垂名不朽

重建排墓橋疏

斷橋人不渡如弱水以隔蓬萊小徑曲通村奈荒野而  
披榛棘溪分燕尾路繞羊腸必飛梁重壓烟波則大道  
直趨城郭金壁一揮于長者斧斤羣集而成之浮杯僧



不用驚鷗題柱客儘看乘駟設天上填河靈鵲毋聽謠  
傳躡空中跨水長虹佇看高步吐嗟事辦讚嘆福生

遠塵居疏為善慶堂作

歷數河沙未盡僧祇之劫遠離塵垢詎忘我佛之言一  
把茅得以蓋頭三條篾儘堪縛腹道須多助室乃苟完  
離舊隱稍入深居近新洋最為佳境展開一坐具地截  
斷諸塵勞門寒山帚不用掃除明鏡臺毋勞拂拭招白  
雲為伴侶更無心出巖岫之間對玉峰作畫圖其妙趣

在丹青之外以安隱入作清淨觀

陵口慈院化修造疏

扶起法幢據一帶江山之陵口飛來禪錫憇十方雲水  
之路頭剪荆棘重作叢林掃埃燼仍為寶地數年不輟  
百廢俱興今將捲屋上之茅從新覆瓦更合剡塔前之  
草依舊磨磚構層軒奉七佛之師望北闕祝一人之壽  
小必芻向前料理大檀那直下承當種種莊嚴綿綿接  
續使工師求木聚良材以待匠石之需為長者折枝修

因果而有福田之報惟金爾諾斯玉其成

方外交疏賀蘭楚芳住法濟寺

以大法濟世而出接跡前修如小山招隱而來增輝同  
列布金園雖云廢毀硬鐵漢斯可承當某人學有淵源  
名揚湖海虎阜藹騰雲之氣在昔與教藏通靈蛟溪響  
流水之聲至今效分座說法道將行矣人皆仰之西排  
灣重見珠林東印土俱成寶地陶彭澤入遠公社更不  
勞沽酒見招韓昌黎聽穎師琴自肯為賦詩相贈忘形

緇素同志清高

塔寺疏

青山門匝地荆榛化城安在紅塔寺倚天樓閣勝地重  
開雖芻芻卓錫而經營必檀越布金而成就掃除瓦礫  
整頓林泉壘七級之浮圖復還舊觀成一區之蘭若永  
守清規報施主恩祝聖人壽

設冥道場榜

金仙慈愍開八萬四千方便之門寶公科儀指一十二

數超升之路既殷勤而修設宜次第以宣揚燃解脫香  
秉光明燭緇流星集幡影雲揚專追悼于一靈敬皈依  
于三寶禮菩薩諸天聖衆名阿鼻十府冥王法雷鳴鑊  
鼓之音甘露灑盂之供演大乘法懺除累世愆尤燃  
藥師燈照破諸途幽暗施伽陀食濟衆饑虛散五彩之仙  
花解多生之冤結爾齋主必加精恪無願不從我清衆  
各盡虔恭有感斯應伏願佛光普照法理圓通成就功  
德山積算比恒沙之喻脫離生死海亡靈得淨土之遊

作佛事薦陳都事疏

名同仁字仲堃  
前常郡經歷

念伯道之無兒誰承祭祀賴西方之有佛可冀超昇追  
悼同寅投誠大覺伏念某官儒林拔萃任路蜚英五六  
年勞贊畫蘭陵卓然可敬四千里赴承宣蓮幙遽爾云  
亡桐棺敢葬于太原本主奉祠于精舍供陳蔬筍香爇  
旃檀世尊放玉毫相光釋子誦金剛般若集恒沙之功  
德為淨土之莊嚴表我交情助公冥福伏願洋洋如在  
濯濯厥靈栢子庭前聽法會西來祖意蓮華臺上遊魂

得上品化生

方外交疏賀微太古住天寧寺

一天寧有內外之稱經權並用九雲夢無芥蒂之迹觸  
背俱亡惟麟膠可續斷絃侶烏獲能勝重任道之行也  
人皆仰之某人前輩老成單提正印早入寂照室得徑  
山骨髓而歸親承圓悟宗聳秀峰頭角而出由由然寸  
絲不挂堂堂乎大器晚成坐蘭陵茅一道場納芥子大  
千沙界蘇州有常州有總成嘉話舊雨來今雨去皆與

忘情鐘鼓雷鳴衣冠雲集古調倡陽春白雪餘香存晚  
節黃花韓昌黎海上留衣特致敬大顛之意蘇子瞻山  
中解帶不妨問佛印之禪凡與鷗盟永言為好

方外交疏賀聰聞極住天寧寺

毘陵稱劇郡天寧為第一禪林泗州留法衣風化有許  
多因地舊網羅重新振舉大力量直下承當湖海推賢  
山林增重某人堂堂偉器藉藉英聲虎阜師承聞圓悟  
相傳之極致龍河法藏得維摩未譯之先幾浮盃使日



出之邦駐錫憇春申之浦有聲畫無聲詩等為遊戲橫  
說禪豎說教儘自圓融踞此猊床香雲繚繞拈將塵拂  
花雨繽紛石池種靈運之蓮山門對獨孤之檜道則高  
矣美矣人皆見之仰之三十年黃河清喜遭遇今朝之  
盛日十八賢匡廬社者振興前輩之高風凡我同盟順  
爾成德

薦亡女疏

女因產而亡

蝮母裂腸於生育轉致冤愆象王慈眼於沉淪能令解

脫皈依大覺敷露微忱切念亡女某氏為結子之桃花  
一時飄墜視當塔之蕓莢三載更新欲撤靈幃弘開法  
席梵唄演瑜伽教典慈恩降阿鼻獄人寶燈破冥路之  
昏斛食濟陀林之餒罪如霜釋業比冰消極漂溺以上  
慈航洗穢濁而歸淨土伏願佛天覆燾慧日照臨大乘  
上乘最上乘哀諸功德欲界色界無色界從此超昇

常州府天寧寺修造疏

娑婆世大千沙界往古來今毘陵郡第一道場殘山剩

水大法幢要人扶起老禪衲領衆支撐開甘露門持修  
月斧佛有殿似靈光巋峙獨整天龍衛從之威鐘有樓  
如五鳳添修庶免風雨震凌之患新兩廡而鴈堂奕奕廣  
丈室而猊座巍巍形勢依金城湯池周圍護銀山鐵壁  
興言多助立見有成視銀杏為雙樹林數百尺鬱蔥佳  
氣接曇花從五竺國二千年奕葉餘芳

除服設醮薦亡疏

明發懷人恐沉淪於下土齋沐祀帝敢對越於上蒼仰

瞻威顏俛瀝情悃伏願恩光普照見旭日于雲中魂氣  
超升御靈飈于天上

日之方中恩輝廣被天之所覆大德難名謹陳伉儷之  
情尚乞哀矜之賜伏願一誠天鑒幸獲接于齋壇萬罪  
冰消獲早生於仙境

日之夕矣事亡如存天何言哉有感必應稽首三瀆馳  
情九霄伏願黑籍除名竟飄然而遺世丹梯飛步即從  
此以登仙

居喪踰古制之期勉嬰世務煉度伏高真之力可濟幽靈  
仰顧洪鈞俯陳丹悃切念亡室某氏生無妬忌能內助  
以成家備歷艱辛甫中年而即世琴瑟之音固絕室家  
之意難亡命黃冠演其科儀設清供同乎禴祭敷宣道  
典歌詠步虛諸孤除服以追哀十極降恩而超度伏願  
朝紫金闕乘織女之雲車居白玉京勝嫦娥之月府尚  
期遺澤益裕後昆

重建後餘橋疏

論靈鵲填河之事每笑謔傳假祖龍鞭石之神何憂病  
涉睜此馮湖頭濶港寔為鶴溪上要途惟諸賢發鄭僑  
濟人之心則良工用媧氏補天之手以舊石加諸土木  
看新冬成此津梁客有馬長卿必為題昇仙之柱賢如  
鄭子產毋勞用溱洧之車

太平興國寺修塔造寺疏

毘陵郡諸山起廢幸此明時太平寺一塔歸存依然壯  
觀風摧雨壞歲久月長戒壇與梵宇俱亡畫水在圖經

空載巍巍乎七層巨構茫茫然百晦荒基扶天柱之傾  
宜先出手聽風鈴之語會有知音雖卓錫已有人焉而  
布金必須長者千年鐵柱觀看青蓮居士重禮寘僧半  
天拍闌干待簡齋先生留題佳句聿成勝事求著修名

常州府送聰聞極住蘇州萬壽寺

一笑視齊雲舍利頓現神光三遷至禪月道場能繩祖武  
遽爾風吹別調本來雲出無心某人見合真知聞皆極  
致是空是色出熙怡藍外之青自本自根得妙喜骨中

之髓進非躡等道在力行狎床擁五色香雲塵拂灑六  
時花雨以淞江太湖倒傾其法海于長洲茂苑振起其  
宗風登東山登泰山道眼蓋明于天下處北海處南海  
交情何異于日前尚曰隣封毋忘舊好

常州府請中道立住天寧寺

乾毒發一花五葉之春流芳震旦天寧為四縣諸山之  
冠填重毘陵必須得前輩老成乃可為後學師表切有  
請也聞斯行之某人有蘊皆空無道不立山林下工夫



鎮密湖海間聲價崢嶸無準翁祖派傳來得寧翁虎邱  
之親授穹窿山寶珠拈出陞景山狻座以盛行連年橫  
野渡之舟此日擊誓江之楫平地把法幢扶起獨圍隨  
坐具展開白槌雷鳴緇侶雲集金斗城鳴抱關之柝鐘  
鼓相聞鐵門限待問話之人衣冠聿至佇溪三祝同寅  
一誠

普庵堂修齋安奉德藏主靈位代蟠作

叢林鐘鼓道本貴于同修祠宇香燈義不忘于前輩敢

謂東山小宗之從子仰于西方大覺之慈悲憫愍具陳  
慈悲諦聽切念故師伯藏主德公早遵父訓過匡廬蓮  
社之門繼得師承入靈隱竹泉之室主名山大藏教  
典涉危途十餘載兵戈常時若緘口無言凡事皆灰心  
不作雖病業難逃于俗舍乃寂滅預知乎去期法已荼  
毘禮宜蒲供安奉覺靈于舊隱宜揚科教于今辰伏願  
成就菩提圓融般若六十五年娑婆世界夢幻俱空百  
千萬億清淨法身光明普照

延福菴衆設法華道場保安疏

居安慮危愍衆生之煩惱扞災禦患賴諸佛之慈悲俯  
述輿情仰干大覺切念某人等家居長幼咸寄幻於兩  
間氣候燠寒或違和於四體共闡道場于延福同宣妙義  
于法華爐爇寶香藹祥雲之繚繞花生銀燭增慧日之  
光輝伊蒲列供于齋筵因果緣成于梵宇伏願佛天覆  
幬法雨露濡五運六氣之流行無災無害七喻三周之  
功德無運無邊凡在乎隣里鄉黨之間共享此壽富康

寧之福

延福庵修造疏

修月之斧數千世傳異事補天之石五色神立竒功矧  
草創之禪林乃檀那之福地若加修補愈更作興或捨  
舊而圖新或哀多而益寡斧彼鋸彼輪焉真焉上漏下  
濕處任在巧墁東塗西抹時光生髮飾孔方兄但能助力  
阿羅漢別當現身非莊嚴是名莊嚴此福德勝前福德  
展開一坐具舉頭皆延福道場更上一層樓彈指見華

嚴境界願言金諾事悉玉成

常州天寧寺請性天之住山疏

金天地作瓦礫場空王殿巋然突兀鐵門限為戈戟用  
僧伽衣久矣劫灰必得人扶起法幢特為我展開禪席  
瓶盂雲集鐘鼓雷鳴某人北山三鷹早歲入曇翁之室  
西江一吸無人當馬祖之鋒煮虛空煨折脚鐺談般若  
聚點頭石在處香雲繚繞有時花雨繽紛時止時行了  
無星礙浙左浙右靡不依歸今菟裘為將老之營而竿木

乃逢場之戲幸無多讓勇為此行吳山青越山青拄杖  
挑白雲飛起常州有蘇州有滿船載明月歸來

延陵精舍疏

并叙

昔司馬公諸君子在洛為邵堯夫先生買宅人到  
于今稱之今叔漁江徵君世居江陰與延陵季子  
墓同里清風高節實景慕之邇來避地吳下擬欲  
築延陵精舍于淞江之上使學者有所依歸吾黨  
之士宜相率以助其費亦庶乎為堯夫買宅之意

也不揣僭言作成幸甚

君子攸居不鄙九夷之陋英才可教常存三樂之心欲  
衿佩之游從宜齋廬之講習非助我者孰能為之切見  
某人喬木故家飄蓬叔世書劍客長洲茂苑襟懷藹和  
氣春風五色筆之文章家傳久矣十字碑之賢墓鄉念  
存焉築精舍笠澤之濱揭故園延陵之扁既不忘于桑  
梓且樂育于菁莪願言為長者折枝僉曰使工師求木  
美輪美奐鼓瑟鼓琴試看荷蕢過門之徒皆為升堂入

室之士青山在上流水在下馬公樂花竹餘春先生如  
邱學舍如舟蘇子以蓋塩送老亟圖燕賀永締鷗盟

呈長洲縣請修顧元公祠堂文

嘗謂古昔名賢合奉烝嘗之禮世俗淫祠豈容混雜其  
間風化所關事宜改作切見晉散騎常侍贈侍中驃騎  
將軍開府儀同三司顧元公相門華裔文武全才當時  
與陸機陸雲並稱三俊王道慕江南之望張華號南金  
之奇以樂道而鼓琴能知人之錫炙平六州之大亂成



一代之奇功其他勲業具載晉史祭典曰有功于民則  
祀之若元公之賢理宜廟食今墓在長洲縣二十九都  
皇天蕩南舊有祠堂為鄉里奉嘗之地近被一等無知  
小民將本處廢廟中土地神像移入本祠使夫婦列坐  
玉石混淆惑亂觀聽於理未應如蒙官為致祭撤去續  
添神像禁斷樵牧整葺祠宇非惟尊先賢辨淫祀以明  
禮法且能正人心厲風俗有補風化為此合行具呈

崑山州學講堂上梁文

設庠序學校之教于國中人倫為重聞金石絲竹之音于  
堂上聖道彌尊賴有人心上經綸見此屋眼前突兀恭  
惟知州相公理明聖學職守神州念斯文重繫綱常知  
厥職實兼師帥如文翁化蜀多除弟子更繇似常衮治  
閩親與諸生揖讓顧瞻鶚泮乃構鱣堂看接武布武於上  
下之間快求仁得仁於講論之際先聖人洋洋如在賢太  
守赫赫厥聲視鄭之不廢鄉校而過之比魯公能修泮  
宮而成矣齋廬俱備廊廡亦新駟虞之德諸侯之風是

皆本先王之教宗廟之美百官之富喜共窺夫子之門  
爰舉修梁敢陳善頌

梁之東日出扶桑麗太空五色喜看祥瑞現八荒  
都在照臨中

梁之西湖上青山玉笋齊千里風塵銅馬去四郊  
春雨錦鳩啼

梁之南負郭人家菴繭蠶共愛甘棠周召伯重歌  
岐麥漢張堪

梁之北江水滔滔歸水國人心亦自水朝宗聲教  
依然流九域

梁之上萬象森羅天蕩蕩日邊氛祲已全銷天下  
太平今可望

梁之下州里絃歌總風雅三吳德化服淮夷多士  
文章繼班馬

伏願上梁之後一人有慶萬邦咸寧舞干羽格苗氏之  
頑大禹班師而勿用修文德來遠人之服顯更近費以

何憂化日舒長士風益盛

募朋友置十七史疏

農有菑畬可盡耨鋤之力儒無簡策曷資講習之功借  
于人或謂為癡閱于市自亦可笑切見某人螢窗苦學  
陋巷甘貧十七史歷代之書擬求善本數千載古人之  
事具欲周知區區未遂其志咄咄不離于口割鷲股奈  
何無肉刮龜毛安得成種雖君子存固窮之心在朋友  
有通財之義多助寡助大書特書便令載米家之船管

取挿鄴侯之架知之者好之者樂之者相與講明歲之餘日之餘時之餘儘教披玩其為感佩奚可弭忘

當時以中統鈔題助者趙師呂蕭昭卿王伯祥王子芳王仲德各一百貫葛用中王君壽道士鄧混然各五十貫祁塵外蕭子璋金君玉各廿五貫僧瑀玉林甘貫命甥女婿周朋舉詣集慶路干託士友陳雲心買紙儒學內印置共作四百六十冊所用裝潢作料二真等費計二百貫澹泊齋藏貯諸史時至元五年

歲在己卯余在鳴鳳王氏家塾是書至至正丙申春  
因避兵寄藏金壇縣尹秀峰家其子吾婿也

勸募刊思賢錄疏

代張希尹作

某伏覩故宋道鄉先生鄒忠公常郡名賢程門傳道其  
一言一行皆可為天下法若龜山楊公了齋陳公南軒  
張公晦菴朱文公丞相李忠定公諸賢咸有贊述宋季  
及元郡守校官暨諸名士嘗為表著祠墓之作散諸四  
方者不一龜巢老人謝某裒輯成編名思賢錄凡若干

卷然非鋟梓以傳則忠與賢之文辭將遂湮沒寧不惜  
哉某比以梨板百片助之其鋟之資尚有望于好事君子  
書成之日度諸學宮庶得以貽永久也洪武十一年  
八月中秋日江陰張端


刊龜巢摘稿

代王尚綱作

嘗觀石鼓之詩閱二十餘年剥落未盡學者猶可得而  
傳焉近代板刻頗亦類此今吳中黃宗禮氏欲以龜巢  
謝先生之詩鏤板而傳之適以事阻因循十年敢用告



諸君與巢翁相知諸為協力玉成其事夫巢翁之詩多以忠孝節義形于詠歌苟得刻本以廣其傳于世教豈小補哉



龜巢稿卷十